

In dien Kopp passt allens rin

Birgit Lemmermann

In dienen Kopp passt allens rin,
de 's grötter as en Regentünn.
Bi Dag schasst waak ween, Mathe lehren,
Drahtesel flicken, Köök utkehren,
mit Frünnen spelen, Hamsters fuddern,
bi Disch liek sitten, leev ween to Muddern.
Man wullt du 'savends slapen gahn,
denn fangt dat all an, optostahn:
Dör löppt en Sluddermööm üm 't Huus.
Un op dien Nachtdisch danzt en Muus.
Dreihst du di üm, speelt 't Kanink Versteken,
un rütert ünner diene Deken.
En Peerd mit Punkten op sien Fell,
en lilla Wulk, un Steerns hell,
de huppert över'n rode Wisch,
un striepte Appel fleegt vun'n Disch.
En Schaapschuur op en Boot ut Reet,
un bunte Dwargen op en Fleet,
de koomt ut dienen Schrievdisch rut,
en Voss hett Blomen in sien Snoot,
un achtern Diek, in 't düüster Holt,
dor steiht en groten Putt mit Smolt,
un föffteihn Katten, de swatten, groten
hebbt Strietschoh an de weken Poten.
De loopt dor jümmers rüm un rüm,
bams, fallt een in 't Aquariüm.
Dor swemmt en Fisch, mit gullen Schuppen,
de fangt an, Nudelsupp to kaken,
un laadt de Katt to'n Eten in.
Dat's all in diene Regentünn!
So kannst di freien, jede Nacht,
bruukst gor nich bang ween, op de Wacht
sitt ünner't Bett, dat weetst du goot,
en gritzgröön Krokodil mit Hoot.